

欽
定
全
唐
文

欽定全唐文卷十一目錄

新文藝出版社藏書

高宗一

大唐紀功頌并序

監國求賢令

爲攝太傅高儉設榻令

爲文德聖皇后薦福令

建大慈恩寺令

諭普光寺僧衆令

答沙門慧淨辭知普光寺任令

答張行成因旱請致仕表手制

加潞王周王上柱國別食實封制

定樂舞制

改封禪器物制

申理冤屈制

頒行新令制

免岐王珍爲庶人制

置乾封明堂縣制

封周王顯制

賜謚皇太子宏孝敬皇帝制

即位大赦詔

令京司長官上都督府諸州舉人詔

改元永徽詔

衛士等聽終制三年詔

補授儒官詔

流蕭齡之嶺南詔

賑雍同二州詔

詳定刑名詔

禁獻鷹犬詔

恩宥囚徒詔

流劉大器峯州詔

幸萬年宮詔

旌表揚紹宗妻王氏詔

曲赦醴泉縣詔

立武昭儀爲皇后詔

停進珠玉詔

禁酷刑及匿名書詔

賜蕭鈞手詔

欽定全唐文卷十一

高宗皇帝

帝諱治太宗第九子貞觀二年生五年封晉王十七年四月冊爲皇太子二十三年六月即位年二十二咸亨五年八月稱天皇在位三十四年年五十六謚曰天皇大帝廟號高宗追尊天皇大聖大宏孝皇帝集八十六卷

大唐紀功頌

并序

若夫元功攸宰丕業光於帝先神用斯冲峻道輝於象外至於炯誠千祀昭訓百王則有彫金揚不朽之基鏤玉啟

無疆之迹而阪泉師律旌德之範未章疇野兵鈐銘徽之
典猶闕乘巢革夏慝先覺於丹碑濟鮪戡殷媿生知於翠
碣惟睿之失其大者歟自否運辭炎墊寓之災梗極餘靈
泣素稽霄之浸滔天風夏癸以昏初則忠良旣逐政殷辛
之虐往則邦國斯悴穀霏黃而霧地下黷方祇繩亂赤而
兩天上塲圓象人怨神怒語亡之兆遽彰衆叛親離規存
之謀遂爽月弓宵而空桂則蝕屢金波星箭夕而奔榆則
妖飛玉弩塵埋五岳見陵谷之遷移水竭百川覩江湖之
騰沸鼎已問於輕重裂周網者七雄德遂寢於休明絕秦

網者幾國天工是代紫庭無享規之賓神道克恭元冕乏
郊禋之辟故以鄒瀛眇眇同結向隅之悲亥跡茫茫共軫
推溝之怨妖精紊象寶庫延災萃綠林者煙霏屯黑山者
霧合戰龍于野則亂起干戈飛鴻在陸則害生戎馬先文
皇帝憫黎元之已燎救焚洪燄之爐悼品物之將淪拯溺
橫流之溘握寶符於代北肇建丹旗剖神珠於漢東方撫
白羽運五材而杖順陰陽未測懸兩耀而龔行幽明叶契
而武關先入楚猴之暴未誅漸臺雖覆蜀鼉之聲猶振王
充盜移鳳宸註誤伊瀆竇德假署龍官虔劉趙魏同惡相

濟共爲脣齒先帝威

闕一

有截思入無方窮幽測神研幾

作聖薛公三策明出下科陳相六奇懸符上略親御姬鉞

問罪晉京墨守屢殫般攻益贍鑿脩

闕一

之壤舉覆匱而

成山引曲洛之波沃濫觴而爲沼飛衝業業降臨負戶之

危長隧悠悠上窺析骸之急奔鯨之穴染鍔非遙封豨之

林倒戈斯在建德驅白波之衆濟馬頰之津據青犢之資

踐牛口之谷吞沙石而賈勇召風雨而成梟圖解鄴城之

圍規降上黨之守蜂飛萬旅狷起千羣竭汜水之洪流褫

岨山之崇堵羽書狎至駟遽交馳夕照趙烽晨驚魯柝於

時謀臣鉗口息其請箸之談猛將含牙弭其穿札之氣或
請退師函谷以避前鋒或請反旆峻陵以圖後舉先帝乃
謂諸將曰本欲先定灑東次平河朔今既遠投天網自取
膏原建德若擒王充必敗號亡虞滅理有固然韓并魏從
義無或爽天實贊我不可失乎兵道尚奇屬斯舉也牽裾
之議踐幕庭而局影斷鞅之規望轅門而闕一息獨決神
衷總排輿誦留偏裨之將分拒王城引趨武之師移和制
邑榮波遠派遙䟽官渡之濱廣武斜臨迴據成臯之險嚴
闔概日巨防陵雲寰中逐鹿之郊寓內闕二之地興亡之

道楚漢之迹猶存得喪之途曹袁之基未泯以代藩之貴
均士伍之勞處唐侯之尊等更徭之膳越醪霑惠赴白刃
以求仁楚續銜恩捐蒼壁而取義廼率數百騎入其境五
十餘里觀其部列摩壘而旋於是醜類相奔凶渠競進短
兵交戰長圍亟合望柘弧而盡殪類棊布於中原應蕭斧
而咸摧若星羅於平隰僅而獲反

關一字

無一焉

關一字

夫趙

主入秦昭之關事從權免晉后察王敦之壘道以詐全業
蹈往辰功優昔載自是鋒芒遂劔鉦鼓載衰奪林父之心
破姜維之膽退歸漳溢恐天討之乘奔遠

關一字

轅轅懼王

師之兼弱深溝板渚斂轡車關數十罪而不驚示三驅而
未款乃休牛洛汭暫息桃林之墟牧馬河陽聊駕襄城之
野樵蘇已遠虛月壘以招兵雉堞不修偃日羽而延寇建
德深然楚間不疑秦謀空峭壁以徑前沈輕舟而直進先
帝勒兵背水列騎依山光流闕鞏之甲聲振武安之瓦神
規嶽鎮未許代御之辭聖略川凝無受致師之請欲戰不
可求反無路肇自霞初迄於景晏湯風爛石溽暑流金羸
糧不從壺漿莫繼思仇餉於葛野想蠲渴於梅林齊侯絕
華泉之遊楚將無穀陽之飲窮魚失水望清漢而摧鱗竭

烏傾巢仰曾天而折翮先帝別命旌麾以乘其背親當矢
石以擊其心表裏夾攻遠邇同至始見開行跡鴈分彼陣
以弱其鋒終乃合勢形虵離敵衆而孤其力冀馬追風彩
桃花而翼路燕犀奪日輝若枝而鏡野縱金憤關隴之氣
凌險若夷浴鐵惋熊羆之心陷堅如朽應龍畫角百川爲
之震蕩靈鼉制鼓九鎮所以傾頽投石蒙輪霜映彫戈之
末翹關拔距電流文劍之端舉長篲以布新卷崩雲以祛
稜攻虛匪實塵靡藉於曳柴擊衆以寡火無勞於結燧俘
虜十餘萬斬首三千級生擒建德徇於城下覲顏流汗曾

無解揚之言懷德畏威翻有蒯通之說然後操袂闕二伏

鑰旗亭臍燃董卓之膏頭飲智瑤之器王充牽羊請服刑

馬求盟開定鼎之郊獻測圭之邑義貞白水信縟丹書赦

其縲櫬之辜宥其挺堦之命情安共主忘鯁氣於田橫怨

切周天忍終凶於魏豹於時診卷東浸鏡萬里而河清妖

歛西氛陣千重而雲散昔高宗鬼方致伐遠克三年周武

牧野陳師尚勞再駕未有曾吞宇宙掌握乾坤正西北之

傾天軸東南之毀地英謀一振功成晷刻之間勅敵雙擒

業茂須臾之頃故能基大寶於王業錫祉元珪掃元凶於

天步臻祥綠錯國八紘而績禹功邁敘倫家六合而心勳
德超則大犧皇語聖既桀往而堯今農帝方神遂昏前而

關二

奇謀沖秘非假書於黃石雄斷縱詎窺符於元女

近以五載巡初省方伊洛九冬狩晚講戎許鄭舉鸞旗而
遐指飛翠蓋以長驅垣壘肅而未遷山川儼而無改徘徊
丹浦事求聞禮之辰顧步青邱情異撫軍之日波瞻舊激
水變沈沙之奇堞望前墉城餘拔幟之所是以滄哀霜露
攀日月而不追茹痛風枝懷天地而莫報金墀在御方九
仞以悲深玉案外珍擬萬鍾而

關一

切麟圖

關一

範義百

楹書鳳篆留規道千裘治虔守天位憂輟峻於洪基肅奉
帝猷誠虧光於寶祚屬辭抽思實無覲於揚名相質披文
庶有裨於紀德乃爲頌曰

乾綱肇絕神鼎初飛妖凌三季兵纏九圍元功孰纂神器
無歸瞻烏逐變即鹿乘機穆穆聖祖桓桓神武電擊河汾
雲飛京宇克清龍戰載安鼇柱禮叶禋宗樂諧率舞漳濱
猬起洛汭鷓鴣張荐鷲權闕一亟犯封疆裂冠稱帝犯蹕圖

王豈知吳滅未辨虜亡睿后生知謀絕羣彥雲朝西伐霜
戈東戰元惡懸首凶渠革面一縱闕一擒義多昔卞冰銷

卷之二 二

日域霧斂星區龍庭受吏鳳穴來蘇虔奉天祿恭膺帝圖
 陶甄太素亭育尊盧啟光夏政誦恢周道濫以菲躬聿承
 大寶宅侔宇宙業均犧昊豈闕一英明實資衡保載省王
 風順驅月駟津由漂鹵途經絕轡思動則天慕纏因地敬
 愛攸屬明發奚洎寒移暑謝律變星迴陣雲先滅月壘猶
 開毀垣殘柳塞井荒苔水侵闕一石燧掩飛灰泗水詞班
 濟陽紀蔡式傳經略敢竭虛昧坤紐方輿乾張圓蓋騰實
 萬古飛英百代

監國求賢令

仰惟聖訓奉以周旋虛想異人共康神化式遵曩軌分驚翹車企覲英靈欽聞政道宜頒下州郡妙簡賢良其有理識清通執心貞固才高位下德重任輕或孝弟力田素行高於州里或鴻筆麗藻美譽陳於天庭或學術該通博聞千載或政事明允才爲時新如斯之倫並堪經務而韜光勿用仕進無階委身蓬葦深爲可歎所在官僚精加訪採庶使垂綸必察操築無遺一善弓旌咸宜舉送

爲攝太傅高儉設榻令

攝太傅申國公士廉朝望國華儀型攸屬寡人忝膺監守

實資訓導比日聽政常屈同榻庶因諮白少祛蒙滯但據
案奉對情所未安近已約吏不許更進太傅誨諭深至使
遵常式辭不獲免輒復敬從所司亦宜別以一案供太傅

爲文德聖皇后薦福令

寡人不造咎譴所鍾年在未識慈顏棄背終身之憂貫心
滋甚風樹之切刻骨冥深每以龍忌之辰歲時興感空懷
陟屺之望益疚寒泉之心既而笙歌遂遠瞻奉無逮徒思
昊天之恩罔寄烏鳥之情竊以覺道洪慈實資冥福冀申
孺慕是用歸依宜令所司於京城內舊廢寺妙選一所奉

爲文德聖皇后即營僧寺寺成之日當別度僧仍令映帶
林泉務盡形勝仰規忒利之果副此罔極之懷

建大慈恩寺令

營慈恩寺漸冀向功輪奐將成僧徒尚闕伏奉勅旨度三
百僧別請五十大德同奉神居降臨行道其新建道場宜
名大慈恩寺別造翻經院虹梁藻井丹青雲氣瓊礎銅沓
金環花鋪並加殊麗令法師移就翻譯仍綱維寺任

諭普光寺僧衆令

蓋聞正法沒於西域像教被於東華古往今來多歷年所

而難陀迦葉馬鳴龍樹旣同瓶瀉有若燈傳故得妙旨微
言垂文見意是以三十二相遍滿人天十二部經敷揚刹
土由其路者則高騁四衢之上迷其途者則輪迴六趣之
中理窟法門元宗祕藏非天下之至蹟孰能與於此乎皇
帝以神道設教利益羣生故普建仁祠紹隆正覺卜茲勝
地立此伽藍請赤縣之名僧徵帝城之上首山林之士擁
錫來遊朝廷之賓摠衣趨座義筵濟濟法侶說說實聚落
之福田黔黎之壽域加以叢楹疊擗寶塔華臺洪鐘扣而
弗誼清梵唱而逾靜若夫盧毗那佛坐普光法堂靈相葳

蕤盼蠻以今方古闇與冥符名器之間豈容虛立然僧徒
結集須有綱紀詢諸大衆罕值其人積日搜揚頗有僉議
咸云紀國寺上座慧淨自性清淨本來有之風神秀徹非
適今也至於龍宮寶藏象力尊經皆挺自生知無師獨悟
豈止四諦一乘之說七處八會之談要其指歸得其真趣
而已固亦滌除元覽老氏之至言潔淨精微宣尼之妙義
莫不窮理盡性尋根討源其德行也如彼其學業也如此
今請爲普光寺主仍知本寺事法師比者逡巡靜退不肯
降重殷勤苦請方始克從但菩薩之家體尚和合若得無

誚三昧自然永離十纏亦願令寺諸師共宏此意其迎請之禮任依僧法

答沙門慧淨辭知普光寺任令

忽辱來書甚以傾慰三復之後自覺欣然竊聞如來雖迹起人間而道籠天外神功妙力不可思議寂爾無爲則言語道斷湛然常在則心行處滅但爲衆生煩惱漂沒愛河得不大極橫流令登彼岸故出入三界昇降六天經營十方良爲於此若夫鹿園福地鷲嶺靈山灑甘露於禪林轉法輪於淨域付囑菩薩濟拔黔黎然後放光面門滅影雙

樹寶船雖沒遺教猶存即是如來法身無有異也然人宏道非道宏人遠有彌勒文殊親承音旨近則圖澄羅什發明經教五百一賢信非徒說千里一遇蓋非虛言法師昔在俗緣門稱通德飛纓東序鳴玉上庠故得垂裕後昆傳芳猶子嘗以詩稱三百不離於苦空曲禮三千未免於生滅故發宏誓願迴向菩提落彼兩髦披茲三服至如大乘小乘之偈廣說略說之文十誦僧祇八部般若天親無著之論法門句義之談皆剖判曾懷激揚清濁至於光臨講座開置法筵精義入神隨類俱解寫懸河之辯動連環之

辭碧鷄譽於漢臣白馬稱於傲吏以今倣古彼復何人所
以仰請法師爲普光寺主兼知紀國寺上座事又聞若獨
善之心有限則濟物之理不宏彼我之意未忘則他自之
情不坦且普光紀國俱是道場舊住新居有何差別法師
來狀云魚鹿易處失燥濕之宜斯乃意在謙虛假稱珍怪
昔聞流水長者遂能救十千之魚曠野獵師豈得害三歸
之鹿但使筌蹄不用則言象自忘

答張行成因旱請致仕表手制

密雲不雨遂淹旬月此朕之寡德非宰臣答實甘萬方之

賁用陳六事之過策免之科義乖罪己今勅斷表勿復爲
辭

加潞王周王上柱國別食實封制

門下維城道峻理恢於邑壤分社寄隆義先於榮秩雍州
牧潞王賢潞州牧周王顯瑤坡挺禎璇源發彩令聞彰於
詩禮英徽表於岐嶷戎章之寵宜允於具瞻膏腴之恩式
遵於故事並可上柱國各加別食實封一千戶餘如故

定樂舞制

國家平定天下革命創制紀功旌德久被樂章今郊祀四

懸猶用干戚之舞先朝作樂韜而未伸其郊廟享宴等所
奏宮懸文舞宜用功成慶善之樂皆著履執拂依舊服袴
褶童子冠其武舞宜用神功破陣之樂皆被甲持戟其執
纛之人亦著金甲人數並依八佾仍量加簫笛歌鼓等並
於懸南列坐若舞即與宮懸合奏其宴樂內二色舞者仍
依舊別設

改封禪器物制

古今典制文質不同至於制度隨代沿革唯祀天地獨不
改張斯乃自處於厚奉天以薄又今封禪即用玉牒金繩

器物之間復有瓦罇秸席一時行禮文質頓乖駁而不倫
深爲未愜其封祀降禪壇所設上帝后土位先設橐秸瓦
甌瓢杯等物並宜改用裊褥罍爵每事從文其諸郊祀亦
宜準此

申理冤屈制

門下大帝降鑒無幽不燭下人上訴在屈必申將使處巖
廊者戶牖絕千里之蔽仰億兆者門庭無九重之隔故堯
推心以撫俗業濟天下湯克己以察冤惠乎海內朕祗膺
寶曆寅奉璇圖常居安以戒危每在得而思失慮一夫之

不獲憂萬方之有罪以爲承平旣久區宇至曠州邑相望
衆庶殷阜事繁則詐起法弊則奸生念茲冤滯深懷惻隱
是以頻發詔書庶幾息訟比命申理未副朕懷百姓雖事
披論官司不能正斷及於三司陳訴不爲究尋向省告言
又卻付州縣至有財物相侵婚田交爭或爲判官受囑有
理者不申或以按主取錢合得者被奪或積嫌累載橫誣
非罪或肆忿一朝枉加殺害或頻經行陣竟無優賞或不
當矢石便獲勲庸改換文簿更相替奪或於所部憑倩織
作少付絲麻多收絹布或營造器物耕事田疇役即伍功

雇無半直又境內市買無所畏憚虛立賤價抑取貴物實
貪利以侵人乃據估以防罪或進退丁戶等色多有請求
或解補省佐之流專納賄賂或徵科賦役差點兵防無錢
則貧弱先行有貨則富強獲免亦有鄉邑豪強容其造請
或酒食交往或妻子去還假託威恩公行侵暴凡如此事
固非一緒經歷臺省往來州縣動淹年歲曾無與奪欲使
元元何所控告見在京訴訟人宜令朝散大夫守御史中
丞崔謐朝散大夫守給事中劉景先朝請郎守中書舍人
裴敬彝等於南牙門下外省共理冤屈屬戶所有訴訟隨

狀爲其勘當有理者速即奏聞無理亦示語發遣其有虛相構架浪擾官方若經處分喧訴不絕者宜即科決使知懲厲仍限今年十二月內使了其在外州縣所有訴說冤滯文案見未斷絕者並令當處速爲盡理勘斷務使甘伏勿使淹滯若處斷不平所司糾察得實者所由官人隨即科附可布告遐邇使知朕意主者施行

頒行新令制

門下蓋上帝臨下覆幬之德彰焉聖人在上財成之跡著焉然則統天理運微政令不能通其道經國訓人非渙汗

無以宣其化故羲文演繇后以施命誥四方虞典記言帝
乃敷文被九域豈惟適人振鐸理存乎闡教象闕懸書義
在於垂法雖時分步驟必循先甲之規代變驪駟無革達
名之軌既而淳源已往澆風漸扇奸宄於是萌生譎詐以
之颺起相彼羣俗頗乖於信義顧茲庶尹罕嗣於忠勤尺
一交馳徒有書亭之弊五條間出猶招挂壁之譏非所謂
光闡帝圖作爲人極者也由此綠綈爰降尤慎於繁冗黃
素所施彌崇於喻曉皇家創業抑揚前古粵在貞觀大啟
憲章浹聲教於幽遐燭文明於區宇鴻池衍誥統理詳密

螭鈕騰文規模宏遠固以貽厥將來懸諸日月朕祗肅鴻業恭臨寶位握千載之禎符承百王之末緒凝神闕館託軒夢以憂人採誦康衢用堯心而拯物然以萬機事總恐聽覽之或遺四海務殷慮緝訪之多闕南宮故事綜覈已殫內史舊章搜羅殆盡自御宸扆每懷冰谷身雖處於巖廊情實係於億兆比者在外州府數陳表疏京下諸司亦多奏請朕以爲帝命多緒範圍之旨載宏王言如絲彌綸之道斯洽前後處分因事立文歲序旣淹條流遂積覽之者滋惑行之者愈怠但政貴有恒辭務體要道廣則難備

事簡則易從故自永徽以來詔勅總令沙汰詳稽得失甄別異同原始要終捐華摭實其在俗非便事縱省而悉除於時適宜文雖煩而必錄隨義刪定以類區分上稟先規下齊庶政導生靈之耳目闢風化之戶牖俾夫施之萬祀周知訓夏之方布之八埏共識司南之路仍令所司編次具爲卷帙施行此外並停自今以後諸有表奏事非要切並準勅令各申所司可頒示普天使知朕意主者施行

免岐王珍爲庶人制

經國之制貳則有辟爲臣之道將則必誅況親則宗枝義

兼家國敢懷逆節自桎嚴刑銀青光祿大夫宗正卿員外
置同正員嗣岐王珍志在傾邪行惟險薄頃以寇迹未殄
軍國多虞因集不逞之徒潛爲亂常之計乃欲遠通叛虜
構此兇謀以有上封備聞其狀猶以戚屬初亦致疑遂令
推按具自承伏且王者立法百代所遵稽彼常科罪當殊
死以其可諱不忍加刑俾從放黜以申寬典宜免爲庶人
仍於濠州安置至彼捉搦勿許東西其同謀左武衛將軍
竇如玠試都水使者崔昌右羽林軍使劉從諫蔚州長塞
鎮將朱融右衛將軍胡列直司天臺通元院高抱素右衛

率魏兆內侍省內謁者監王道成等九人特宜斬決試太子洗馬兼知司天臺冬官正趙非熊陳王府長史陳閑楚州司馬張昂左武衛兵曹參軍焦自榮前鳳翔府郡縣主簿李岳國子監館進士張奐等六人特宜決殺駙馬都尉薛履謙同逆謀宜賜自盡

置乾封明堂縣制

東臺元天著象於紫微厚地區域於赤縣外崇四岳伊帝闡其宏規旁別九州元王邵其丕績所以料茲物土畫野分疆相彼人事觀時濟俗開物成務理則由然高祖皇帝

誕膺靈命肇開景業囊括軒頊孕育胥庭太宗文皇帝大
聖登期自天縱哲撲崑岑之猛燎拯滄海之飛流巍巍蕩
蕩無得而名焉朕以虛薄夙奉瑤圖承累德之鴻猷履會
昌之嘉運中外禔福遠邇乂安仰薦成功升禋岱嶽緬維
嚴配祇建合宮感事開元聿光先德俾我黎獻永賴隆平
寧濟之方實資寬簡鑒寐凝想思致厥塗以爲翼翼上京
率土攸仰翦華抗堞貫渭疏瀾城闕崇嚴都邑夷敞戶口
盈積市獄殷繁東西兩縣官曹尚少在於撫字事或難周
至於詞訟綜理時闕須分所職各使兼濟其長安縣宜置

乾封縣萬年縣析置明堂縣並於京城內近南安置其戶口即於兩縣逐便割隸應須官寮并公廨等一事以上並準長安萬年兩縣各令所司處分奏聞庶使憂勤之懷獨映於前古建元之慶長垂於後葉

封周王顯制

昔周武垂則汾邑啟維城之固漢文承統睢陽樹磐石之基所以作鎮邦家克隆景業第七子顯毓粹雲峯分輝日觀風儀秀舉神識沖和挺玉質而含章振金聲而發彩夙遵教於詩禮方導德於閒平既表岐嶷之姿宜申珪社之

貺可封周王食邑一萬戶

賜諡皇太子宏孝敬皇帝制

朕肅承鴻緒無忘馭朽之懷虔奉聖謨每切臨深之懼幸以穹昊垂祐宗社降靈公卿盡叶贊之謀黎庶遂懷生之望故得乾坤交泰日月休徵垂衣而晏九瀛端拱而家六合方將迴鑿峒岫體高尚於軒皇脫屣汾川追逸軌於伊后成功弗處思遵象帝之規守器斯傳用申知子之授皇太子宏生知誕質惟幾毓性直城趨駕肅敬著於三朝中寢問安仁孝聞於四海若使負荷宗廟寧濟家邦必能永

保昌圖克延景厯豈謂遽嬰霧露遂至彌留顧惟輝掌之
珍特切鍾心之念庶其痊復以禪鴻名及賸理微和將遜
於位而宏天資仁厚孝心純確既承朕命掩歎不言因茲
感結舊疾增甚億兆攸係方崇下武之基五福無徵俄速
上賓之駕昔周文至愛遂延慶於九齡朕之不慈遽永訣
於千古天性之重追懷哽咽宜申往命加以尊名夫謚者
行之迹也號者事之表也慈惠愛親曰孝死不忘君曰敬
可謚爲孝敬皇帝仍遵典故式備徽章布告遐邇使知朕
意

即位大赦詔

大行皇帝奄棄普天痛貫心靈若寘湯火思遵大孝不敢
滅身永慕長號將何逮及粵以孤眇屬當元嗣荷構乾儀
若臨冰谷思勵虛薄康濟黎元敬順唯新仰昭先德宜布
凱澤被乎億兆可大赦天下内外文武賜勲官一級諸年
八十以上賚以粟帛雍州及諸州比年供軍勞役尤甚之
處並給復一年

令京司長官上都督府諸州舉人詔

殷宗邁德化致外平周王顯仁政稱刑措太宗文皇帝神

明配德靈武兼資掃欃槍而王區夏混陰陽而作天地以
此大業留屬微躬雖復瑄變星霜而心嬰荼毒州郡之長
能修厥職禮義興行姦回自屏刑憲不苛孤惸是賴有司
詢訪宜以名聞有一於此當超不次其有經明行修談講
精熟具此巖才堪膺教胄者志節高妙識用清通博聞疆
正終堪卿輔者遊情文藻下筆成章援心處事端平可紀
者疾惡揚善依忠履義執持典憲終然不移者京司長官
上都督府及上州各舉二人中下州刺史各舉一人前代
忠鯁身死王門子孫才堪任官而留滯停移者既想遺風

尤宜旌舉

改元永徽詔

比者恭膺寶位乃叶天時繼奉休命必因正朔太宗文皇帝龔行天罰寧一區夏宏功無外盛烈難名攀望微猷哀盈園寢朕以寡德守茲神器仰憑堂構俯暢生靈酌彼彝倫道兼文武方今孟陬獻節常儀佇厯三元首事萬國來庭宜遵經國之典以叶陽和之義可改貞觀二十四年爲永徽元年

衛士等聽終制三年詔

通喪下達聖哲彝訓緯俗經邦咸率茲道至於嬰蓼莪之
巨痛懷顧復之深慈得自天經含生罔極者也爰自周衰
七雄交爭逮乎漢末三方競峙金革亟動鉦鼓日聞先王
典章掃地將盡遂令三邊武猛墨經而扈戎麾七萃驍雄
素冠而事巡警亦有內無繼體傍闕同氣几筵安寄奠酌
不親廼睠於斯載深驚歎朕膺茲景命君臨九野中區富
教外俗永規宜有解張以勵風俗衛士掌閑幕士等遭喪
合期年上者宜聽終制三年

補授儒官詔

昔勛華肇政仁義居先殷周創基教學成本朕嗣立鴻基
裁成丕緒如臨於海罔知攸濟思得學徒用康庶績而頃
歲所敦先諸聖教青襟方領未達至懷唯欲思轅固以加
班想高堂以授秩斯文寥落去之彌遠深加發慮稱朕意
焉儒官員闕即宜補授其館博士助教節級賜物三館學
士有業科高第景行淳良者所司簡試俱以名聞

流蕭齡之嶺南詔

華州刺史蕭齡之粵以常才累叨非據入參九列出總六
條番禹重鎮控攝遐遠心如谿壑聚歛無厭不憚典章唯

利是視豪門富室必與交通受納金銀二千餘兩乞取奴婢一十九人赦後之贓數猶極廣羣僚議罪請處極刑奏決再三即合從戮但人命至重每存審慎又其驅策自久桑榆漸迫諸子號叫伏闕求恩哀矜之心發自懷抱宜免腰領之誅投身瘴癘之地可除名配流嶺南遠處庶存鑒誠頒示天下

賑雍同二州詔

朕寅畏三靈憂勤萬類分宵軫慮曷忘滄跡在巖廊心遍天下懼八政之或舛憂一物之未安欲使菽粟積於京

全史卷之三十一
三

坻禮讓興於萌俗而德不被遠誠未動天政道有虧咎徵
斯應去歲三輔之地頗弊蝗螟天下諸州或遭水旱百姓
之間致有罄乏此繇朕之不德兆庶何辜矜物罪已載深
憂惕今獻歲肇春東作方始糧廩或空事資賑給其遭蟲
水處量以義倉賑貸貧乏雍同二州各遣郎中一人充使
巡問務盡哀矜之旨副朕繾綣之心

詳定刑名詔

門下朕聞大德曰生肖天地而爲貴大寶曰位體宸極以
居貞所以經緯三才彌綸萬物順人心以敷化因天討而

立刑易稱明罰哀矜之志愈遠書云肆眚簡惠之道斯崇
故能象服畫冠化隆上葉道德齊禮刑清中代暨乎大道
既隱淳風已衰元首司契徇驕奢以臨下股肱贊道用深
刻爲奉公罪名積於簡書滋章被於率土姬訓夏法峻網
備於三千秦革周科深文加於九族漢祖約法後嗣不勝
其弊晉武蠲刑末流竟致其酷遂使茫茫區寓罔犴所以
實繁蠹蠹黔黎手足爲之無措自斯以降禁網愈密歎深
袁準之書事切劉宏之奏太宗文皇帝至道難名元功不
測撥亂反正恤獄慎刑杜澆弊之餘源削繁苛之峻法道

臻刑措二十餘年恥格之義斯隆惻隱之懷猶切玉几遺
訓重令刊改瞻奉隆規興言感咽朕以虛寡夙嗣寶圖寅
畏上元憂勤庶類乘奔履薄懼一物之未安旰食宵衣慮
萬方之多罪雖解網之德有慙列聖而好生之惠無愧伊
心於是仰遵先旨旁求故實詔太尉揚州都督監修國史
上柱國趙國公無忌開府儀同三司上柱國英國公勣尚
書左僕射監修國史上柱國燕國公志寧尚書右僕射監
修國史上護軍北平縣開國公行成光祿大夫侍中監修
國史上護軍蓍縣開國公高季輔銀青光祿大夫行黃門

侍郎平昌縣開國公宇文節中書侍郎柳奭右丞段寶元
太常少卿令狐德棻吏部侍郎高敬言刑部侍郎劉燕客
給事中趙文恪中書舍人李友益少府丞張行實大理丞
元紹太府丞王文端刑部郎中賈敏行等爰逮朝賢詳定
法律酌前王之令典考列辟之舊章適其輕重之宜採其
寬猛之要使夫畫一之制簡而易從約法之文一作章踈而
不漏再移期月方乃撰一作始成宜班下普天垂之來葉庶
設而不犯均被皇恩一作均凡在羣司一作臣逮於列岳其
務在審慎稱朕意焉

禁獻鷹犬詔

弋獵畋游素非所好嘗謂此志布於遠近而蕃夷有獻鷹
犬者慮阻來遠之情時復爲受示以不違其意其諸州及
京官仍有訪求狗馬鷹鶻之類來進深非道理自今後更
有進者必加罪責

恩宥囚徒詔

去秋少雨冬來無雪今陽和在辰春作方始膏澤未降良
疇廢業或恐獄訟之間尚有淫濫含冤未達弗辜致罪百
姓有過責深在予宜順彼發生申茲恩宥在京及天下囚

徒死罪宜降從流流已下放免鰥寡憚獨及篤疾之徒量
加賑恤務令得所

流劉大器峯州詔

窺窬圖讖必以亡身滅族斯皆先賢設教歷代舊章今大
器乃與妖人往還虛占禍福矯託天命包藏逆心非意自
彰已歸嚴憲今屈法免死者繇朕寡德所致故也去春遺
愛等逆起於前今冬大器禍彰於後一歲之內再有此釁
朕宵興自思非無深愧

幸萬年宮詔

朕恭膺寶命嗣奉瑤圖居萬乘之尊當四海之貴遐觀往
烈詳求前古每希蹤於哲后常勞心於庶務兢懼弗寧憂
勤若厲屬天下無事區宇有截仰高風於汾射暫清暑於
林泉朕昔在震宮侍遊茲壤山川如舊歲月不追今旣俗
阜年和華夷胥悅緬懷徽範情兼感慰宜遵省方之義且
順陽和之序曲申惠澤式彰寬宥行幸所經諸縣及岐州
囚徒行人犯罪者流降徒徒已下並免之

旌表楊紹宗妻王氏詔

故楊紹宗妻王氏因心爲孝率性成道年迫桑榆筋力衰

謝以往在隋朝父歿遼左招魂遷葬負土成墳又葬其祖
父母等竭此老年親加版築痛結晨昏哀感行路永言志
行嘉尚良深宜標其門閭用旌敏德賜物三十段粟五十
石

曲赦醴泉縣詔

朕恭膺大寶嗣隆景業虔奉成則光闡宏猷昧旦兢懷宵
分動慮蒼昊垂祐宗社降靈順黎元之心藉忠賢之力俗
登仁壽道暨升平遠肅邇安時康俗阜履端受節陽和肇
氣親率庶僚奉謁陵寢遺弓永慕切終身之憂撫鏡纏悲

興寒泉之思敬深如在哀隆罔極薦享既畢精禋獲申式表因心宜宏愷澤可曲赦醴泉縣并行從人大辟罪以下皆赦除之百姓宜免今年租調右監門員外將軍常基在此宿衛進爵一等陵令陵丞各加一階并節級賜物

立武昭儀爲皇后詔

武氏門著勲庸地華纓黻往以才行選入後庭譽重椒闈德光蘭掖朕昔在儲貳特荷先慈常得侍從弗離朝夕宮壺之內恒自飭躬嬪嬙之間未嘗迕目聖情鑒悉每垂賞歎遂以武氏賜朕事同政君可立爲皇后

停進珠玉詔

少府監非軍國所需宗廟之用並不須飾以珠玉諸州常貢珠寶者並宜停進其市肆間不得更爲彫鏤及貨鬻珠寶及金銀等物

禁酷刑及匿名書詔

朕聞小大以情義重前誥哀矜勿喜道光遐冊朕恭膺寶業嗣臨億兆留心聽斷劬勞日昃一物乖方納隍軫慮今旣科格咸備憲制久行鞠訊之法律條具載深文之吏猶未遵奉肆行慘虐曾靡人心在含氣之倫稟柔脆之質乃

金定全月三
卷一
三
有懸枷著樹經日不解脫衣迴立連宵忍凍動轉有碍食
飲乖節殘酷之事非復一途楚痛切身何求不得言念及
此深以矜懷又挾匿名書國有常禁凡厥寮庶咸應具述
近遂有人向朝廷之側投書於地隱其姓名誣人之罪朕
察其所陳皆極虛妄此風若扇爲蠹方深自今以後內外
法司及別勅推事宜並依律文勿更別爲酷法其匿名書
亦宜準律處分庶使泣辜之情遠覃於四海卹刑之旨長
垂於萬葉

賜蕭鈞手詔

朕聞防禍未萌先賢所重宮闈之禁其可漸歟昔如姬竊符朕用爲永鑒不欲今茲自彰其過所搦憲章想非濫也但朕翹心紫禁思覲引裾側席朱楹冀旌折檻今乃喜得其言特免四通等死遠處配流

欽定全唐文卷十二目錄

高宗 二

禁幻戲詔

放宮人詔

降太子忠爲梁王詔

立代王宏爲皇太子詔

減膳詔

令州縣舉人詔

令百官各舉所知詔

公主王妃見舅姑父母勿答拜詔

停諸節進獻詔

僧尼不得受父母及尊者禮拜詔

分立彌射爲興昔亡可汗步真爲繼往絕可汗詔

建東都詔

禁縣主稱出降詔

禁讓官詔

臨文不諱詔

禁止臨喪嫁娶及上墓歡樂詔

令僧道致拜父母詔

停慶賀糜費詔

禁留獄詔

停封禪及幸東都詔

恤刑詔

李義府罷相詔

罷諸州造船安撫百姓詔

舉行封禪所司集獄下詔

加宇文思純朝散大夫詔

遣使慮囚詔

頒行麟德歷詔

安置舞曲詔

贈孔子爲太師詔

上老君元元皇帝尊號詔

宗廟薦享別奠詔

仍用開元通寶錢詔

宗祀高祖太宗配帝詔

贈顏曾詔

改元總章大赦詔

欽定全唐文卷十二

高宗二

禁幻戲詔

如聞在外有婆羅門胡等每於戲處乃將劔刺肚以刀割
舌幻惑百姓極非道理宜並發遣還蕃勿令久住仍約束
邊州若更有此色並不須遣入朝

放宮人詔

爲國之道必從簡惠正家之義允歸儉約故知興替之本
得失之基爰自六宮刑於四海旣而西都之后累葉驕奢

東漢之君相繼淫佚魏庭晉室採擇無厭水運倉積選納
逾廣節文旣廢怨曠滋深糜費極多流弊忘反朕以寡薄
嗣奉瑤圖臨馭八紘亭育萬類向隅之念每切於憂兢納
隍之心實勞於夙夜率由成訓仰遵先旨即位之初備加
寬貸年老宮人已令放出椒掖之內人數猶多久離親屬
之歡長供掃除之役永年幽閉良深矜憫又去年霖雨頗
傷苗稼在於州縣非無乏少資給後庭有妨國用宜申茲
大造更量放出宮人可令官司料簡具錄名帳所司依狀
散下歸其戚屬若無近親任求配偶所在官府存心安置

勿使輕薄之徒輒行欺誘空有竊貲之弊便無借老之託
務加存恤令遂所懷

降太子忠爲梁王詔

昔泰伯高讓載昌姬宗東海之藩克隆漢祚故能業傳端
委胙錫龜蒙飛茂實於前英播清虛於遠葉皇太子忠分
景扶木稟慶天津早加寵樹禮絕羣后比因朝見屢陳撝
挹論嫡庶之分辨貴賤之禮以貴則皇后有子以賢則不
敢當仁前後數四情辭懇惻義高曠古道邁前修宜遂雅
懷以成厥美可封梁王食邑二萬戶持節都督梁洋集壁

四州諸軍事梁州刺史仍別食二千戶賜物二萬段甲第一區梁州仍置都督府

立代王宏爲皇太子詔

洵雷揚祉承祧之道爰著重離闡曜守器之方斯存故能撫寧軍國永保邦家詳覽瑤圖緬瞻遐冊繼業垂統咸率茲典代王宏道居嫡允天縱英姿器質沖華神鑒昭遠恭謙表志仁孝居心夙彰睿哲之風早通詩書之業朕以虛薄方啟無疆之祚永傳不朽之基取則前王思隆正緒宜升上嗣養德東宮可立爲皇太子仍令所司擇日備禮冊

命

減膳詔

上封人所進食極惡情之憂灼中宵輟寐永言給足取愧
良深夫國以人爲本以食爲天百姓不足君孰與足朕臨
御天下於今七年每留心庶績軫慮農畝而政道未凝仁
風猶缺致令九年無備四氣有乖遂使去秋霖滯便即罄
竭所以佇西郊而結念眷東作以勞懷豈下乏農夫上甘
珍饌宜令所司常進之食三分減二

令州縣舉人詔

朕受命上元嗣膺下武每肅恭旒冕延想英奇俯振鷺而
企貞臣仰飛鴻而慕良輔雲臺側席玉管屢移宣室整衣
金壺亟改寂寥靡覲寤寐興懷比年雖嘗進舉遂無英俊
猶恐棲巖穴而韜奇樂邱園而晦影宜令河南河北江淮
以南州縣或緯俗之英聲馳管樂或濟時之器價軼蕭張
學可帝師材堪棟輔者必當任之不次可明加採訪務盡
才傑州縣以禮發遣

令百官各舉所知詔

濟時興國實佇九功禦敵安邊亦資七德朕端拱宣室思

宏景化將欲分憂俊乂共逸巖廊而比者貢寂英奇舉非
勇傑豈稱居安慮危之志處存思亂之心如不旌賁遠近
則爪牙何寄宜令京官五品以上及諸州牧守各舉所知
或勇冠三軍翹關拔山之力智兼百勝緯地經天之才蘊
奇策於良平馳功績於衛霍蹤二起於吳白軌雙李於牧
廣賞纖善而萬衆悅罰片惡而一軍懼如有此色可精加
採訪各以奏聞

公主王妃見舅姑父母勿答拜詔

天地之尊人倫已極舅姑之敬禮經攸重苟違斯義有數

金史卷之二十一
一
日
彝則如聞公主出適王妃作嬪舅姑父母皆降禮答拜此
乃子道云替婦德不循何以式序家邦儀刑列辟自今以
後可明加禁斷使一依禮法若更有以貴加於所尊者令
有司隨事糾聞

停諸節進獻詔

朕撫育黎庶思求政道欲儉以訓俗禮以移風菲食卑宮
庶幾前軌比至五月五日及寒食等諸節日并有歡慶事
諸王妃主及諸親等營造衣物雕鏤雞子競作奇技以將
進獻巧麗過度糜費極多皆由不識朕心遂至於此又貞

觀年中已有約束自今以去並宜停斷所司明加禁察隨
事糾聞

僧尼不得受父母及尊者禮拜詔

釋典沖虛有無兼謝正覺凝寂彼我俱忘豈自尊崇然後
爲法聖人之心主於慈孝父子君臣之際長幼仁義之序
與夫周公孔子之教異轍同歸棄禮悖德深所不取僧尼
之徒自云離俗先自貴高父母之親人倫以極整容端坐
受其禮拜自餘尊屬莫不皆然有傷名教實斁彝典自今
以後僧尼不得受父母及尊者禮拜

分立彌射爲興昔亡可汗步真爲繼往絕可汗詔
自西蕃罹亂三十餘年比者賀魯猖狂百姓重被劫掠朕
君臨四海情均養育不可使凶狡之虜恣行侵漁無辜之
眚久遭塗炭故遣右屯衛將軍蘇定方等統率騎勇北路
討逐卿等宣暢皇風南道撫育遠使凶渠畏威夷人慕德
伐叛柔服西域總平賀魯父子旣已擒獲諸頭部落須有
統領卿早歸闕庭久參宿衛深感恩義甚知法式所以冊
立卿等各爲一部可汗但諸姓從賀魯非其本情卿等纔
至即降亦是赤心向國卿宜與盧承慶等準其部落大小

位望高下節級授刺史以下官

建東都詔

朕聞踐華固德百二稱乎建瓴卜洛歸仁七百崇乎定鼎
是以控膏腴於天府啟黃圖於渭濱襟沃壤於王城攜綠
宇於河渚市朝之城麗皇州之九緯丹紫之原邈神臯之
千里二京之盛其來自昔此都中茲宇宙通賦貢於四方
交乎風雨均朝宗於萬國置繫之規猶勤測圭之地載革
豈得宅帝之鄉獨稱都於四塞來王之邑匪建國於三川
宜改洛陽宮爲東都上棟下宇彼勞昔以難前廣厦高臺

我名今而改後仍茲舊貫式表宸居

禁縣主稱出降詔

古稱釐降唯屬王姬比聞縣主適人皆云出降娶王女者亦云尚主濫假名器深乖禮經其縣主出嫁宜稱適娶王女者稱娶仍改令文

禁讓官詔

凡百具僚羣公卿尹除命甫及多存飾讓言勵己以辭榮未舉能以自代既取當年之誚還愆曩烈之風自茲厥後須革前事必欲稅駕濠濮褫紱巖廊宜各舉所知自代仍

宜顯述才行送付中書省將隨才敘用

臨文不諱詔

孔宣設教正名爲首戴聖貽範嫌名不諱比見鈔寫古典
至於朕名或缺其點畫或隨便改換恐六籍雅言會意多
爽九流通義指事全違誠非立書之本意自今以後繕寫
舊典文字並宜使成不須隨義改易

禁止臨喪嫁娶及上墓歡樂詔

如聞父母初亡臨喪嫁娶積習日久遂以爲恒亦有送葬
之時共爲燕飲遞相酬勸酣醉始歸或寒食上墓復爲歡

樂坐對松檟曾無感容既點風猷並宜禁斷仍令州縣捉
搨勿使更然

令僧道致拜父母詔

東臺若夫華裔列聖異軫而齊驅中外裁風百慮而同致
自周霄隕照漢夢延輝妙化西移慧流東被至於元牝邃
旨碧落希聲具開六順之基偕叶五常之本而於愛敬之
地忘乎跪拜之儀其來永久罔革茲弊朕席圖登政崇真
導俗凝襟解脫之津陶思常名之境正以尊親之道禮經
之格言孝友之義詩人之明準豈可以絕塵峻範而忘恃

怙之敬拔累貞規廼遺溫清之序前欲令道士女冠僧尼等致拜將恐振駭恒心爰俾詳定有司咸引典據兼陳情理沿革二塗紛綸相半朕商推羣議沈研幽蹟然箕頽之風高尚其事遐想前載故亦有之今於君處勿須致拜其父母之所慈育彌深祇伏斯曠更將安設自今已後即宜跪拜主者施行

停慶賀糜費詔

比每誕育王子公主諸親慶賀多進錦繡纂組金銀雕鏤虛有糜費深乖節儉自今以後即宜並停

禁留獄詔

哀矜折獄義先呂訓明慎用刑事昭姬象朕以寡昧嗣登
宸極思闡大猷式隆景運陷冰是懼屢想於懷中御朽彌
兢馳襟於裕下虛已待物每從寬政如聞率土州縣留獄
尚繁困於囚繫致於病死一歲之中數盈二百蓋繇上愆
亭育之化下乖堯舜之心深責在躬興言多媿抑又聞之
與我理天下者其惟良二千石今之所任或虧政道未詳
欽恤之旨但徇苛刻之情幽繫因滯證逮遐廣寒暑相襲
風露交侵淹乎年月成其病苦加以榜笞失度桎梏違法

巧詆深文去將安適獄市之寄何其爽歟自茲以後宜革前弊罪無大小不得稽留其囚病患及罪輕并笞杖等雖法有常規恐典吏妄生威福官人不存簡較或顏面囑請觸類以之若仍舊不悛當加重罰布告天下知朕意焉

停封禪及幸東都詔

海東二蕃久愆職貢近者命帥薄伐軍務事殷緣河州縣勞於征役比雖多有蠲免庶事優矜萬邦俱會恐致煩擾勞逸二途理無兼遂介邱大禮及幸東都並宜且停

恤刑詔

天德施行陽和在節言念幽圜載惻分宵雖復每有哀矜
猶恐未免枉濫在京繫囚應流死者每日將二十人過

李義府罷相詔

右相兼行殷王府長史河間郡公李義府緣茲小技累升
顯地塵露之益未表於銓流公廉之譽有紊於彝典漏禁
中之語鬻寵授之朝恩交占候之人輕朝望之哀禮蓄邪
黷貨實玷衣冠稔惡嫉賢載虧政道特以任使多年未忍
加其重罰宜從遐棄以肅朝倫可除名配流嶺州其子太
子右司議郎津專恃權門罕懷忌憚奸淫是務賄賂無厭

交遊非所潛報機密亦宜明罰屏跡荒裔可除名長流振
州

罷諸州造船安撫百姓詔

朕以寡昧纂承鴻烈肅展巖廊之上凝襟華裔之表馭奔
深於日慎儲祉存於勿休勉已勵精詳求大化往爲奉成
先志雪恥黎元是以數年之間稱兵遼海雖除凶戢暴義
匪諸身疲人竭財役興於下泛滄流而遐濟踐危途而遠
襲風濤競駭或取淪亡鋒鏑交揮非無捐軀顧惟匪德事
有乖於七旬在躬延責情致慙於四海湯年罪已鑿寐斯

在漢載富人周旋切念日者翹車聯映賁帛相輝庖鼎之前猶潛秀異關析之下未盡英奇傳逸翰於西雍物殊寶於東序比王師薦發戎務實繁州縣官僚緣茲生過力役無度賄賂公行蠹政傷風莫斯爲甚前令三十六州造船已備東行者即宜並停凡百在位宜極言得失悉陳無隱以救不逮仍分遣按察大使問人疾苦黜陟官吏兼司元太常伯竇德元往河南道並持節分往其内外官五品以上各舉巖藪幽素之士廣加詢訪旁求謠俗式企英材充毗闕政必使八紘之内咸得朕心萬寓之中同夫親覽宜

速頒賜率土知此意焉

舉行封禪所司集嶽下詔

宜以三年正月式遵故實有事於岱宗所司詳求茂典以從折衷其諸州都督刺史以二年十二月便集嶽下諸王十月集東都緣邊州府襟要之處不在集限天下諸州明揚才彥或銷聲幽藪或藏器下僚並隨嶽牧舉送

加宇文思純朝散大夫詔

周京兆尹左右宮伯大將軍司衛上將軍少冢宰廣陵郡公宇文孝伯忠亮基心貞堅表志淫刑旣逞方納諫而求

仁忍忌將加甘捐軀而殉節年祀雖永風烈猶生宜峻徽
章式旌華胄其孫左威衛長史思純可加授朝散大夫

遣使慮囚詔

今陽和布氣東作聿興甘澤雖霑猶未周洽睠茲南畝彌
用憂勤瞻彼西郊良深兢惕宜順發生之序以申簡恤之
恩西京及東都諸司雍雒二州見禁囚徒宜準龍朔元年
慮囚例處分其西京令左侍極兼檢校大司憲陸敦信充
使東都令右肅機盧承慶充使必令息彼冤滯稱朕意焉

頒行麟德歷詔

夫氣象初分乾坤之位斯定剛柔遞運寒暑之節攸施而
晦朔相循炎涼再革歸乎推步方紀歲時顓頊應期重黎
司天地之職放勳承統羲和掌日月之官履端之道無睽
舉正之典斯在洎乎末代漸至踈闊鄧平之術旣已多乖
朱浮之言罕能遵用九章五紀莫究精微日次月躔寧循
舊度朕御天撫歷君臨萬方眷言茲道將恐淪缺欽若垂
化曷爲憑焉爰命所司研窮詳正仰稽七曜傍綜五家去
其煩衍裁以要密古所未通今則備載陰陽之數可測盈
縮之理無愆改元履初占考此歷歲唯甲子得於天正合

朔之後應以嘉祥五緯若連珠二曜若合璧雖上元致瑞
實增祇愧而推測所詳固以精悉氣序恒順分餘弗舛以
授農時升平可致昔洛下閎造漢厯云後八百歲當有聖
人定之自火德洎我年將八百事合當仁朕亦何讓宜即
宣布永爲昭範可名曰麟德厯起來年行用之

安置舞曲詔

舊文舞武舞旣不可廢並器服總宜依舊若懸作上元舞
日依奏神功破陣樂及功成慶善樂并殿庭用舞並須引
出懸外而作其安置舞曲宜更商量作安穩法並錄凱安

六變法象奏聞

贈孔子爲太師詔

朕聞德契機神盛烈光於後代化成天地元功被於庶物
魯大司寇宣尼父孔某資大聖之材屬衰周之末思欲屈
已濟俗宏道佐時歷聘周流莫能見用想乘桴以永歎因
獲麟而興感於是垂素王之雅則正魯史之繁文播鴻業
於一時昭景化於千祀朕嗣膺寶歷祇奉睿圖憲章前王
規矩先聖崇至公於海內行大道於天下遂得八表乂安
兩儀交泰功成化洽禮盛樂和展采東巡回輿西土途經

茲境撫事興懷駐蹕荒區願爲師友瞻望幽墓思承格言
雖宴寢荒蕪餘基尚在靈廟虛寂徽烈猶存孟軻曰自生
人以來未有若孔子者也微禹之歎旣深褒崇之道宜峻
可追贈太師庶年代雖遠式範令圖景業維新儀刑茂實
其廟宇制度卑陋宜更加修造仍令三品一人以少牢致
祭褒聖侯德倫旣承允緒有異常流其子孫並宜免賦役
主者施行

上老君元元皇帝尊號詔

大道混成先二儀而立極至人虛已妙萬物以爲言粵若

老君朕之本系爰自伏犧之始暨乎姬周之末靈應無象
變化多方遊元氣以上昇感日精以下降或從容宇宙吐
納風雲或師友帝王丹青妙化譬陰陽而不測與日月而
俱懸交喪在辰晦迹柱下大宏雅訓垂範將來雖心齊於
太虛而理歸於真宰若夫絕聖棄智安神寡欲寂寞杳冥
之際希夷視聽之表淡爾無爲悠然自得酌之不竭用之
不盈執大象以還淳滌元覽而遣累邈乾坤而長久跨陶
鈞而亭育至矣哉固無得而名也況乎大聖所資克昌寶
祚上德所履允屬休期朕嗣膺靈命撫臨億兆總三光之

明而夙宵寅畏居四大之重而寢興祇惕盡孝敬於宗祧
 罄懷柔於幽顯行清靜之化承太平之業登介邱而展采
 坐明堂而受記飛煙結慶重輪降祥鶴應九歌山呼萬歲
 越振古而會休徵冠帝先而為稱首大禮云畢回輿上京
 肅駕賴鄉躬奠椒醕仰瑞柏而延佇挹神泉而永歎如在
 之思既深敬始之情彌切宜昭元本之奧以彰元聖之功
 可追上尊號為太上元元皇帝聖母為先天太后祠堂廟
 宇並令修創置令丞各一員以供薦饗仍改谷陽縣為真

源縣

宗廟薦享別奠詔

朕以寡德嗣守宗祧雖明發載懷肅恭禋祀踐霜露而興感奉盥洗以增哀每惟宗廟至敬虔誠裸享而二尊一奠情有未安思革舊章用崇嚴配管子曰禮者因人之情緣禮而爲之節也故三王五帝禮制不同損益隨時期於適便沉罔極之恩旣展於茲辰終身之慕情深於是日豈可以因循經禮乖違敬誠自今以後宗廟薦享爵及簋簋登鉶各宜別奠其餘牢饌並依常典

仍用開元通寶錢詔

泉布之興其來自久實古今之要重爲公私之寶用年月
既深僞濫斯起所以採乾封之號改鑄新錢靜而思之將
爲未可高祖撥亂反正爰創軌模太宗立極承天無所改
作今廢舊造新恐乖先旨其開元通寶宜依舊施行爲萬
代之法乾封新鑄之錢令所司貯納更不須鑄仍令天下
置鑄之處并鑄開元通寶錢

宗祀高祖太宗配帝詔

夫受命承天崇至敬於明祀膺圖纂錄昭大孝於嚴配是
以薦鯨鱉於清廟集振鷺於西雍宣雅頌於太師明肅恭

於考室用能紀配天之盛業嗣積德之鴻休永播英聲長
爲稱首周京道喪秦室政乖禮樂淪亡典經殘滅遂使漢
朝博士空說六宗之文晉代鴻儒爭陳七祀之議或同昊
天於五帝或分感帝於五行自茲以降遞相祖述議論紛
紜是非莫定朕以寡薄嗣膺丕緒肅承禋祀明發載懷虔
奉宗祧寤寐興感每惟宗廟之重尊配之儀思革舊章以
申誠敬高祖大武皇帝撫運膺期創業垂統拯庶類於塗
炭寘懷生於壽仁太宗文皇帝德光齊聖道極幾神執銳
被堅櫛風沐雨勞形以安百姓屈已而濟四方澤被區中

恩覃海外乾坤所以交泰品物於是咸亨掩元闕而開疆
指青邱而作鎮巍巍蕩蕩無得名焉禮曰化人之道莫急
於禮禮有五經莫重於祭祭者非物自外至也自内生於
心也是以惟賢者乃能盡祭之義況祖功宗德道冠百王
盡聖窮神業高千古自今以後祭園丘五方明堂感帝神
州等祠高祖大武皇帝太宗文皇帝崇配仍總祭昊天
上帝及五帝於明堂庶因心致敬獲展虔誠宗祀配天永光
鴻烈

贈顏曾詔

皇太子宏近因釋菜齒胄上庠祇事先師馳心近侍仰崇山而景行眷曩哲以勤懷顯顏曾之特高揚仁義之雙美請申褒贈載甄芳烈朕嘉其進德冀以思齊訓誘之方莫斯爲尚顏回可贈太子少師曾參可贈太子少保並配享

改元總章大赦詔

朕以寡薄忝承丕緒奉二聖之遺訓撫億兆以初臨馭朽兢懷推溝在念而上元垂祐宗社降休歲稔時和人殷俗阜車書混一文軌大同簡玉泥金井中告禪百蠻執贄萬國來庭朝野歡娛華夷胥悅但爲郊禋嚴配未安太室布

政敷化猶闕合宮朕所以日昃忘疲中宵輟寢討論墳籍
錯綜羣言採三代之精微探九皇之至蹟斟酌前載製造
明堂棟宇方圓之規雖兼故實肆筵陳俎之法獨運財成
宣諸內外博考詳求度其長短冀廣聞見而鴻生碩儒俱
稱盡善縉紳士子並奏該通創此宏模自我作古因心旣
展情禮獲申永言宗祀良深感慰宜命有司及時赴作務
從折中稱朕意焉今陽和在辰景風扇物昆蟲草木咸獲
康寧朕之百姓尚多勞止思覃惠澤與共更新可大赦天
下改乾封二年爲總章元年大辟罪以下皆赦除之